

[0]靚女

[1]中文科嘅李老師喺學校入面好出名，因為佢係唯一一個短頭髮、著長褲同高踭鞋嘅女老師，連冇俾佢教過嘅學生都會知道佢就係李老師。

佢好受學生同家長歡迎，個個都讚佢教書教得有心機，衣著打扮得體，斯文得嚟又有型。

[2]李老師喺教員室入面改緊功課嗰陣，突然笑咗一聲。隔離位嘅陳老師見佢笑到面都紅晒，就問：「睇緊啲咩咁開心呀？」

李老師揸住個嘴，笑住噉話：「頭先收嘅作文功課係『我的志願』。

「然後有個女同學寫佢嘅志願係要做一個靚女！」

「佢仲話等到十八歲就要去參加香港小姐，人細鬼大……」

[3]李老師望住自己對黑色高踭鞋，繼續話：「其實我讀小學嗰陣，啲頭髮係留到去腰㗎，因為個個大人都話女仔應該要留長頭髮，而且女仔十八廿二嘅時候係最靚嘅。嗰時我好羨慕隔離屋嘅大姐姐可以著住靚裙去行街，我仲試過偷偷哋著媽咪嘅高踭鞋，喺屋企扮大人噉周圍行添！但係我依家嘅諗法唔同咗。」

「做老師成日行行企企，著高踭鞋唔會好叻咩？」陳老師問。

[4]李老師話：「著高踭鞋的確唔係一件舒服嘅事，不過我指嘅唔係呢方面。我覺得，唔只十八廿二，其實女性無論去到咩年紀，或者點樣打扮，都一樣可以好靚。我鍾意依家三十三歲嘅自己，多過當年十八歲嘅自己。」

陳老師反問：「你唔會覺得後生嗰時身體好啲，皮膚望落又靚啲咩？」

[5]李老師話：「講外表，十八歲實係比三十三歲青春㗎！但係依家成熟咗嘅我，有獨立經濟能力，亦都比以前後生嘅我有智慧同信心去面對唔同難題，唔再只係識得跟其他人嗰套睇法。而且我比以前更加識得照顧自己同其他人嘅需要。呢啲都係另一種靚㗎……呀！等我留返個評語畀同學，『靚女』唔一定淨係十八歲先可以做嘅……」

00185:《靚女》Pretty Lady

The CC BY 4.0 license REQUIRES that any reused or repurposed content must have the correct ATTRIBUTION. Please use the text below in your citations, printouts and copyright pages.

Attribution Text

"Pretty Lady" (Cantonese), written by 綠柚子, published by HamBaangLaang (© HamBaangLaang, 2022) under a CC BY 4.0 license on hambaanglaang.hk

[Find out more here: [HamBaangLaang Attribution terms and CC 4.0](#)]

<https://words.hk/zidin/十八廿二>

<https://words.hk/zidin/青春>

[8]三歲定八十

呢個係一個同歲數有關嘅諺語，指人嘅性格喺好細個嗰陣已經成形，可以由此睇出佢第時大個嘅性格特質。

<https://words.hk/zidin/三歲定八十>

[9]後生細仔

另一個廣東話用語係指年輕人嘅，叫「後生細仔」，例如「後生細仔，唔係跑兩步就冇氣下話？」

<https://words.hk/zidin/%E5%BE%8C%E7%94%9F%E7%B4%B0%E4%BB%94>

[10]女大十八變

人喺發育成長階段，外貌同性格都會產生唔少變化。通常啲人話「女大十八變」，係讚緊一個女仔長大後變靚咗嘅解。

<https://kknews.cc/zh-hk/culture/npqvjlq.html>